

穆
堂
別
稿

穆堂別彙卷之二十九

臨川李紱巨來

傳二

傅忠毅公家傳

公姓傅氏諱弘烈字仲謀號介君江西南昌府進賢縣人父應期仕明作令廣西甲申鼎革雲南貴州四川廣東西流寇餘孽各擁故明宗室爲號盤踞山林攻劫城市公少負大畧隨父宦邸道阻不能歸

本朝大兵平定兩廣以人材應募委署平樂府同知尋陞陝西慶陽府知府順治十六年雲南平定吳三桂以平

西親王節鎮其地公久在南中稔知其有異志遂上疏發其不軌之謀言

朝廷宜早爲之所時三桂反形未露部議公離間王大臣逮治論死

聖祖仁皇帝特旨減等流戍廣西梧州康熙十二年冬吳三桂果據雲南反明年廣西鎮守將軍孫延齡叛降于吳逆遣提督郭懋禕捕公甚急欲生得用之公投水求死懋禕援出之送延齡公乃侃侃以忠孝語勸諭且策三桂必敗毋與其禍延齡始有悔心令往南寧聯合交趾接應

王師以圖反正時吳逆僞黨四布延齡令密爲之計公因
僞受將軍職得出入賊黨中十六年三月侍郎舒恕以
安南將軍統兵由贛州進廣東公遺舒恕書曰孫延齡
妻孔王女四貞曾向弘烈言無日不以

太皇太后爲念若降

恩綸赦孫延齡罪封四貞爲郡主卽反正爲大兵內應舒恕
以聞

聖祖特諭兵部抄錄舒恕奏疏并公移文發督捕理事官麻爾
吉俾招撫孔四貞先是廣西巡撫馬雄鎮爲孫延齡所
害故

朝廷命麻爾吉兼辦廣西軍事麻爾吉遵

旨招諭孫延齡反正志定五月乙酉公遣麻爾吉書言目下廣東震動若得大兵速進南安弘烈從中接應前赴韶州以扼廣東咽喉則兩廣可計日而定廣東路通則廣西全省弘烈可一面當之但須假一虛銜方可行事標下官員亦各照原銜換給印劄庶可鼓勵人心麻爾吉代爲奏聞得

旨傳弘烈圖報國恩忠誠懋著可優陞爲廣西巡撫今將軍莽依圖等大兵已進廣東俟傳弘烈迎見軍前卽與勅印其標下官員亦令大將軍簡親王給以印劄丁亥揚威大將軍和

碩簡親王喇布疏報四月二十九日將軍莽依圖領兵抵南安原任提督嚴自明以城降逆賊郭義等遁走我兵屢敗賊衆克取南雄直抵韶州傅弘烈迎見拜巡撫之

命七月丁酉公疏言臣前請大兵接應力任進取兩廣今廣東全省已定廣西乃臣專責無可他諉臣與將軍莽依圖等議欲進兵廣西緣

勅印未至無以爲信且臣兵寡弱必得尙之信官兵同臣進取庶克有濟又收復廣西雲貴須招集土司土司官員專取憑于印信若以廣西雲南各土司印信頒發招撫

一處卽給一新印以杜反覆則逆賊可不煩大兵而滅矣臣標官兵經年缺餉兼少馬匹請量給以資進剿旋奉

旨覽奏詞意忠懇傳弘烈可仍以廣西巡撫爲撫蠻滅寇將軍給以勅印尙之信速遣所屬官兵與傳弘烈同定廣西土司印信禮部鑄給其官兵錢糧令總督金光祖給銀十萬兩俟秋涼再發馬匹等又

命戶部撥銀十萬兩解赴傳弘烈軍前已亥公疏言臣蒙

特恩免死安置梧州廣西布政使李迎春等合謀降賊臣誓死不從棄家投水水師提督郭懋祿救甦送往孫延齡

所臣告以大義從中反間使彼此不睦旋辭往南寧聯合交趾及各土司出梧肇接助平南王尙可喜不意賊兵中變因取道廣東見可喜勸其發兵討賊可喜語臣以

國恩難報爾與我子同心協力復還兩廣勉圖報効臣以決謀合兵尋聞孫延齡爲線成仁所困卽奔江西請大兵接應一路殺賊方抵龍南蒙將軍舒恕等多方接應得成夙志臣不敢隱蔽據實奏聞得

旨據奏地方變叛傳弘烈誓圖滅賊密謀反間聯絡同志又殺敗賊衆具見忠貞奮勇深爲可嘉併本內事情議政王大臣

會議具奏尋議俟粵西平定之日彙敘從之未幾公疏報親
統官兵于韶州地方擊敗賊衆斬殺甚多生擒僞總兵
王雲龍等下部議敘八月癸亥疏言臣率官兵進取廣
西僞將軍趙天元等擁衆萬餘據守梧州出城迎戰我
兵水陸奮擊敗之遂復梧州趙天元等僅以身免是月
又疏報逆賊侵犯梧州臣遣總兵官楊國泰分佈官兵
水陸並剿前後夾擊大敗賊衆于昭平等處地方陣斬
僞總兵張元乘勝逐北本月初三日恢復潯州府獲賊
船器械無算並奉

旨嘉獎下部議敘十月乙巳鎮南將軍莽依圖疏言廣西巡撫

傅弘烈遺臣書言弘烈以兵五千備當西路恐力不能支請滿洲將軍一人率騎兵千餘來至廣西以壯聲勢得

旨傅弘烈進定粵西獨當一路宜以重兵自隨可照廣西經制兵額便宜召募汎守新復地方兼剿寇賊又將軍穆占見領兵赴廣東夾剿韶逆俟穆占抵粵破賊之後與將軍莽依圖等會議作何分兵赴梧接應傅弘烈聽酌量以行是月公疏報楊武營總兵官曾大職剿逆賊于五屯所地方殺獲甚多恢復南平縣丁未疏報平樂府昭平縣距省不遠爲賊犯梧潯出沒之地臣遣標下後營叅將周光裕率

利 卷之二十九
王
兵進取擊敗賊衆斬殺無算恢復縣城公自任巡撫五
戰皆捷恢復梧州平樂三府並奉

旨嘉獎下部議敘十七年三月丙戌

聖祖特諭議政王大臣等今逆賊侵犯潯州諸處梧州高州所
關最要將軍莽依圖可駐鎮梧州若遇高州諸處有警卽行
應援將軍巡撫傅弘烈整頓士馬俟進兵平樂桂林與將軍
額楚都統勒貝署副都統穆成額同行如兵力未足許于莽
依圖等兵內量調前進然所調各路兵未能猝至莽依圖以
兵少退保梧州

聖祖特諭議政王大臣等云自逆賊吳三桂叛變以來大兵諸

路征勦平南王尙之信歸正之時將軍巡撫傅弘烈思念國恩密約反正所領官兵從未支領俸餉輒奮勇入粵西收復梧州諸處殲戮渠帥屢奏捷功嗣以進取平桂規定滇黔奏乞迅發大兵以相助援因遣將軍莽依圖等協力恢取平桂本期莽依圖等與傅弘烈并力平定廣西克濟大事不意莽依圖兵抵平樂寸步不前藉口綠旗營壘失陷遽奔還中山鎮仍復畏縮退至賀縣又託信糧餉不繼徑回梧州以傅弘烈恢復如許城池盡棄于賊今若梧州乏糧必將退回肇慶肇慶乏糧必將退至廣州苟廣州乏糧當復棄廣州而還耶如此怯懦多端託誘不惟誤西征之事卽粵東恐亦可虞頃

有旨令莽依圖駐鎮梧州兼顧高州諸處嗣今宜痛改前轍鼓舞軍士勉圖後效相機勦賊底定封疆爾等其嚴行申飭
閏三月莽依圖以失利退兵致地方失陷自陳請罪乞
罷將軍任

聖祖復切責之曰莽依圖至平樂不能殲寇拓疆擅自退還致
潯州諸處陷賊今乃云末至梧州傅弘烈金光祖早已棄地
明諉過于傅弘烈而巧飾妄奏殊屬不合宜立行處分但現
在行間其仍留將軍任圖功贖罪是月庚申公疏報臣遣潯
協副將林大忠思南副將張文玉等率兵勦賊于容縣
西山等處地方大敗賊衆擒斬無算恢復北流縣城五

月戊申又疏報臣同都統勒貝等統領官兵于四月初
十十三十五等日自北流陸川博白進剿累敗賊衆僞
總統饒一龍等各棄城潛逃恢復鬱林州及北流興業
陸川博白等四縣並得

旨嘉獎

下部議敘是月又疏報僞總兵梁子玉賴天錫聞大兵

到鬱林據守白米嶺峒恃險負隅我兵于四月十六日
黎明攻破逆營斬僞總兵梁子玉生擒其兄弟二人斬
賊兵五百二十餘級生擒二十一名賴天錫拔營遁走
下部議敘先是公疏請進兵南行以向田州泗城六月
乙卯鎮南將軍莽依圖疏言竟入南寧非策宜令將軍

額楚取平樂桂林傳弘烈取南寧兩路齊舉旋奉

聖祖諭將軍莽依圖等向因規定廣西調遣滿漢官兵甚多今
進田州泗城若俟他路諸軍齊集必稽時日若孤軍獨進恐
難有濟平粵事宜所係甚重將軍莽依圖額楚傳弘烈及叅
贊諸臣與總督金光祖等俟克復潯州俱赴梧州面議何路
進兵先取何地務期和衷爲國勿各圖自便七月己未公疏
報僞總兵何興久踞桂東桂陽上猶崇義江楚交界地
方臣遣隨征知縣王世誥招諭隨率兵丁一萬餘投誠
下部議敘是年正月吳逆聞廣西全省復歸
朝廷孫延齡已反正怒遣其孫吳世琮率僞將軍總兵等悉

精銳由宜章入廣西至桂林誘殺孫延齡二月總督金
光祖與賊戰于潯州不利兩廣震動

聖祖命江寧將軍額楚速赴廣西共商攻守十一月額楚至與
公進兵迎擊十二月初三日與賊戰于藤縣衆寡不敵
遂亦失利鎮南將軍莽依圖具疏入告併言藤縣失守
見存兵力甚薄梧州勢危得

旨梧州可虞大將軍平南王尙之信不必往湖南徑赴梧州與
莽依圖等商酌調遣官兵并力剿賊以靖地方如王斷不可
離省卽速選精兵馳赴又韶州南雄已爲內地將軍舒恕可
率領每佐領兵二人急赴梧州至將軍額楚傳弘烈見在討

賊俟事平旋師日察議公平日膽勇過人每戰不能必勝然小挫益厲從不退縮至是以失利爲恨整兵以俟十八年正月吳世琮犯梧州公與鎮南將軍莽依圖率滿漢官兵奮勇拒戰遂大敗之世琮棄營夜遁二月朔捷聞下部議敘八月甲子公疏報吳逆賊帥范齊韓踞柳城融二縣窺伺桂柳接應南寧臣檄永寧遊擊鄧林才會合馬承廕兵協剿擒斬甚衆恢復二縣桂林路通得旨嘉獎下部議敘加太子太保丙子公疏報僞總兵左旌王定邦投誠又僞總兵史自安等以城降臣又遣叅議道劉曉招撫僞總兵李贊唐良等並降下部議敘十二月甲

戊公疏辭巡撫任願統兵進剿雲南言臣先遣叅將溫紹賢等從小路斷賊楓木嶺運道請親統官兵進剿雲貴其廣西巡撫事乞別委官管理疏三上

聖祖始諭應如所奏命傅弘烈親率所屬官兵恢復滇黔諸處與大將軍平南王尙之信將軍莽依圖等協力酌量以行其粵西巡撫事務着麻爾吉署理公遂統兵由柳州徑進至柳遣提督馬承廕爲前隊承廕者已故提督馬雄子也雄于吳三桂初反時卽舉軍降賊雄死承廕領父衆屢抗官軍見公擊敗吳世琮乃復來降至是請公至其署發施號令衆將領咸謂承廕父子反覆不可信公言人已

降奈何疑之率數十騎往赴諸將懼有變率兵尾行公不知也承廕見後有兵至疑爲執已遂激衆再叛執公送貴陽時吳三桂已死其孫世璠僭號居貴陽也世璠及其下渠帥俱素聞公威名欲得爲彼用勸之降公罵世璠曰汝祖未反時吾卽奏叅知汝家必作賊恨不能早滅汝家敢以此言污我耳卽絕粒不食作絕命辭示從者賊素懼其威猶欲其降勸諭百方罵益厲遂遇害十九年十二月癸巳署廣西巡撫右軍事官麻爾吉疏聞言撫蠻滅寇將軍傅弘烈于貴陽陷賊賊授以僞職不屈十月十六日遇害得

旨傳弘烈自投城以來効力粵西著有勞績陷賊不屈捐驅殉
難忠節可嘉深爲可憫應得卹典着從優議奏二十年部臣
覆准

賜祭葬加祭又加贈太子太師兵部尙書諡忠毅廕二子以七
品官用公前後請

留中密疏如預陳尙之信反情佈置投誠官兵及籌畫剿撫
機宜皆洞中肯綮歿後奉

聖祖特旨昭示忠悃盡下其前後密奏布諸中外焉初孫延齡
叛降吳逆時公家死難甚酷比授撫蠻滅寇將軍兼巡
撫因具疏言臣闔門被難自幼子幼女暨家屬一百四

十餘口盡爲逆賊李迎春執送吳三桂分散殺戮鎮臣
楊國泰全家被害及各將士眷屬慘戮情形不得不造
冊報部以請優卹用慰忠魂奉

旨卿爲國忘家志圖滅寇不意逆賊李迎春將卿全家併鎮臣
楊國泰闔門解送誅戮朕心深爲憫惻作何優卹着議政王
大臣會同議奏尋議俟該將軍查明優卹從之至是併
予旌卹二十一年二月奉

命立雙忠祠于廣西以殉難廣西巡撫馬雄鎮與公同祀從廣
西巡撫赫浴請也當康熙初年平西平南靖南三王列
藩分鎮勢傾

朝野吳逆尤鴟張奏立十鎮總兵官皆其親信連兵數十萬運七布政司錢糧協濟之所屬文武將吏拜除疏請必從吏兵二部莫敢支吾謂之西選天下凜凜有尾大之憂然無一人敢明言者公以一知府抗疏發其奸瀕九死不悔斯已奇矣比其反也雲南貴州四川湖南廣東廣西福建並全爲賊有江南江西浙江陝西湖北亦皆被兵喪失郡縣察哈爾布爾尼復反于漠北山西駐防蒙古兵叛應之越邊牆以出其安靖未有事者

京師及山東河南而已當是時天下震動襲王爵者如尙之信鎮守將軍如孫延齡總督如鄭蛟麟金光祖巡撫

如劉秉政羅森曹申吉提督如王輔臣李本深馬雄線
國安嚴自明總兵官十鎮並從賊此外如吳之茂譚洪
楊來嘉祖澤清劉進忠祖弘勳阿爾泰郭義張星耀苗
之秀佟國卿等並降于賊巡撫盧震華善等棄城遁走
督撫死節者范承謨甘文焜朱國治三數人耳然止于
殉難未能擊賊也總督哈占蔡毓榮李之芳能擊賊矣
又皆與

王師並進禁旅之功爲多公獨以戍卒倡義以賊攻賊未
嘗用

國家斗粟寸刃恢復桂平梧潯千餘里之地厥功尤爲奇

偉至于殉難亦復殊常亂之始生闔門死者至百四十餘人功業垂成誤于降將拘幽而不屈卒以身殉可謂百煉之剛矣贈官

賜謚祭葬有加卹典誠厚然我

朝賞功勸忠之法超越千古若海澄公靖逆侯或以節或以功爾公爾侯賞延于世公先見之明應變之智赴敵之勇勘亂之勲死事之烈鴻猷偉伐精忠勁節萃于一身加黃張固已數等而延世之賞未及意當日部臣之議所以推廣

朝廷賞功勸忠之典者或有所未盡乎或謂三藩之變以亂

不速定故當時主將皆不敘功如征南大將軍賴塔至
世宗皇帝追念舊勲始予公爵公之食報庶有待于後乎余生
也晚不及見公其子孫零落亦未識一人近奉

世宗特旨建昭忠祠祀死事諸臣併採

實錄史書各爲之傳而公與焉因敘次梗概授史官庶傳于後
亦以爲鄉黨光焉公生平逸事奇偉者尙多以出于傳
聞皆不敢備書

贈太子太傅大學士謚文貞李光地傳

李光地字晉卿安溪人祖先春以義聞遠近父兆慶爲
邑諸生當明季蔑棄正學時獨好程朱之書光地幼而

敏悟嗜學父授以五經性理勤誦精思至年十七八時
已卓然有前修之志言動造次必于儒者丙年舉于鄉
庚戌成進士選入史館試詔令爲第一授庶吉士旋除
編修癸丑充會試同考官告歸省覲越歲耿精忠以福
州叛鄭經竊踞泉漳光地逃匿深山匿跡自完未幾耿
鄭交攻乃密草疏備陳平閩機宜裊蠟爲丸謀諸季父
日烺偕僕夏澤佯爲江湖術者給出杉關夏澤亟走京
師投內閣學士富鴻基家因大學士以奏

聖祖皇帝手自削蠟出疏讀再三動容稱嘆時康親王南征有
旨命訪求蹤跡保護其家屬至京康熙十六年泉州平超升侍

讀學士將赴

闕丁外艱時同安人蔡寅僞稱故明遺裔裹白巾號白頭
賊衆至萬餘圍安溪縣者再光地簡糾鄉里得精銳三
四百人賊窺伺其鄉乘高欲下光地使弟光埏率百餘
人扼于險要卒不得逞檄諸鄉絕其貲糧應時潰散十
七年鄭經使其將劉國軒圍泉州屬邑皆不守斷江東
萬安兩橋以遏救兵光地遣人從間道走福州漳州請
師以鄉兵迎導于是寧海將軍喇哈達自漳州道安溪
巡撫吳興祚自福州道永春並時而至國軒倉惶解圍
走屬邑皆復事聞升內閣學士兼禮部侍郎服闋入都

不待缺補官頻蒙

召對奏言鄭經死子穉部下爭權專殺人思內向乘今時勢征之必克因力薦施琅可任以專征

聖祖從其言果平臺灣置郡縣焉旋乞奉母歸里居三年入爲掌院學士教習庶吉士充

經筵日講起居注官復以省覲歸假滿赴原任改通政使升兵部侍郎

命視學畿輔內艱解任守制服闋申前

命補工部侍郎士能諷二經以上及古文百篇者加意獎拔由是翕然嚮于古學科試未竣改授直隸巡撫正身率屬

屬吏咸知自勵南隄子牙河北開柳全皆親奉

聖祖指授方略漳漳蘆溝歲不爲患寬墾耕馬廐者以業窮黎
理紅剝船地歸之民案不畱牘獄無滯冤升吏部尙書
仍畱本任四十四年拜內閣大學士

眷倚彌殷旬日間必蒙

召對密論移時光地性敬慎雖其子弟弗得聞故其謀猷入告
罕有傳者其平日持論惟以扶植善類登進俊良爲先
休休有容聞人一善若已有之辛未己丑爲會試總裁
得人爲多爲巡撫薦拔文武部吏至開府擁麾者無慮
數十人或以清修績學在草澤山林而乘時進用者前

後相望光地未嘗言所自其人莫知也自通籍後德望
巍然前輩老宿魏象樞孫逢年等多與爲忘年之交加
以虛心請益有善必取問音學于顧炎武問歷算于梅
文鼎皆略盡其要手不停披洛閩遺書至丹墨數十遍
喜與門弟子講論不厭往復有一言之合卽幡然改已
說而從之故其學日進不已老而益明少以道義自任
有嚴毅不可犯之色及其晚年粹然溫以和所謂讀書
變化氣質之效也最達于易用心五十年及奉

命修周易折中圖書象數之源恭蒙

聖祖親傳奧祕彌以深造前後奉

旨修朱子全書性理精義俱行海內所著有周易通論觀象大
指若中庸章段餘論及洪範說三篇皆心得之妙先儒
復起不易其言又有大學古本說論孟劄記詩所惟尙
書春秋未成書他述著甚富並奉

旨進呈藏于

內殿論其所至蓋真德秀許衡有所不逮蔡清以下無論
矣雅性恬澹明于止足之分而于訐亂中以孤忠大節
上結

主知兼有贊平臺灣之勳

聖祖睠念不忘丐歸常懸缺以待不敢言遂初心在政府十四

年

寵待之禮皆殊恩異數近世人臣未之有也齒踰懸車屢以精力衰邁

奏請僅

予假二年未滿期趣還

朝至京陳懇尤切五十七年夏口

奏乞休方荷

俞旨疏藁已定未及上會舊疾發薨于位年七十有七遺疏聞

聖祖震悼

賜金千兩

遣皇子臨奠工部尙書徐元夢 內廷翰林魏廷珍監護喪事

給全葬與祭謚文貞其歸襯也復

遣皇子臨送行人護至家

今上登極加贈太子太傅

賜祭一次孫清植原任侍講提督浙江學政清馥現任戶部
郎中

大學士謚文端張鵬翮傳

張鵬翮字運青遂寧人康熙庚戌進士選庶常改刑部
主事歷任禮部郎中出知兗州府有廉幹聲以卓異擢
河東鹽道修復鹽池變政大舉內轉督捕理事出使倭

羅斯

聖祖器其能遂由大理少卿巡撫浙江清漕弊覈鹽課建定海
縣城垣壁畫精悉

召爲兵部侍郎尋督學江南清節益著轉都御史奏請核實陝
西籽粒以去民害陞刑部尙書總督兩江改總河河淮
爲南北運道經絡而河自汴徐趨淮歲虞泛溢

聖祖屢幸河隄詳究方略鵬翮抵任卽條上隄工先後十六事
又請區畫木石窳良嚴定屬員考課皆

報可躬勘隄工恪遵

聖祖指示一切堵塞開濬動中窾會清口險要奉

命開支河于清河東引黃北匯于淮其南別築挑水壩以歸引
河鵬翮復塞洪澤六壩挽全湖之力助淮刷黃而浚雲
梯海口使河身近流無闕至是黃淮交滙深契

廢謨漕艘進口舊在駱馬湖旁鑿渠名中河後又改挑新河淺
隘不利行舟鵬翮相度形勢叅用新舊兩河之半合爲
一河各建石閘避黃河百八十里之險從楊莊新閘出
口漕運大便他如通射陽湖則開鬚溝瀉淮楊積水則
濬涇雨河復沐水故道則修築禹王臺隄址咸具成績
聖祖南巡駐蹕慰勞良久加宮保仍入爲刑部尙書轉戶部吏
部山左汶水旱涸運道中梗鵬翮奉

命勘視請疏濬坎河雞爪諸泉分注南旺濟運而于彭口築隄障沙水入微山湖

俞允舉行又往豫省視決河備陳引沁入運利害謂地勢西北高而東南窪若沁從高直下而黃河躡其後且叵測鵬翮諳練河務諸所建白不苟隨衆附和

聖祖每優詔從之

今上登極拜內閣大學士仍兼理吏部尙書事以馬營決口未堵築復銜

命至豫相視鵬翮議并塞詹店四口黃沁合處有沙灘應加濬刷繪圖以進悉

褒納鵬翮平生居官清儉方整有器局于河工最著聲績雍
行三年卒年七十七

上聞軫悼贈少保給祭葬如禮又加祭一次謚文端子懋誠
由舉人仕至通政懋齡淮安府山安同知孫勤望由蔭
生現任寧國府知府

侍讀李公傳

公姓李氏諱澄中字渭清別字漁邨世爲青州諸城人
先世多達者至公尤穎異弱冠工爲文試必冠諸生尤
好爲詩日與青齊楊笠雲吳江洪去蕪等相唱和今體
學盛唐古體學漢魏時方趨宋元詩鮮知公者旣久始

翕然以服相與師宗之歲己未

天子加意文治設博學宏詞科徵天下學古士公用薦應
詔試璿璣玉衡賦省耕詩授翰林院檢討充明史纂修官奮
筆侃侃無所避嘗

召赴瀛臺泛舟賦白蓮詩稱

旨賜予稠疊相國真定梁公奇公才屬爲文操紙千言立就
梁公歎曰真青蓮也庚午典雲南鄉試或以多金遮馬
首公勃然曰敢以此汙我耶疾斥之去有李約山者自
雲南學使者幕中歸與檢討朱竹垞先生彝尊論滇中
人材列所取知名士二十有二人署壁間占公取舍旣

試錄至其不與者纔三人耳。仝垞臨風釀酒南向爲公
得人壽比歸行篋蕭然。孝竹松子石而外。滇行日記詩
數冊而已。公橐筆侍。

禁中十有三載。由贊善歷陞中允。侍講。尋轉侍讀。年六十
有六。謁告旋里。初公孀嫂胡氏殉節。時曾乞公爲立後。
至是以長子沂繼。割田三百畝予之。又公外曾祖邱簡
肅公不祀幾七十年。公擇其族之近而賢者。性善爲其
後。予田一百二十畝。公衣食粗自給。坐是中落。退居灘
上茅屋數椽。僅蔽風雨。亦終無戚戚意。歲庚辰夏六月
某日卒。越月葬歸化鄉。從遊士並來會私謚文確先生。

文學古稱鄒魯北史序文苑溯自曲阜闕里洎七十義
乖淹中稷中猶不失爲賢達今豈不古若耶公積學纂
文奮起豪素間與天下駿雄馳騁其垂名史冊無疑矣
輒先詮次梗概傳之家乘以寵族屬且使子弟好學者
知所取則焉

貞節廖孺人傳

苦節天下之難能者也人求之恒恕若廖孺人者刻求
之而德無不備焉禮曰大備盛德也其斯爲德之盛者
乎孺人姓王氏江西南城縣人祖曰諸生命詔父早歿
以鍼黹佐母養未嘗出柵外鄰人亦罕見之同邑諸生

廖君諱弘勳者故士族少孤遭耿氏之亂掠于賊亂定乃婦刻苦讀書有能文名故孺人歸于廖時年甫十六佐夫以勤儉夫忘其貧踰三歲夫補建昌府學弟子員又七年始餼又五年歲壬申沒孺人年二十有九有子二長理甫七歲次量甫四歲夫病篤時指二子謂孺人吾家自曾祖以下唯吾與二子吾不起能爲我撫二子乎孺人曰能夫笑曰吾固知子能也遂瞑孺人拮据治喪葬盡禮不作佛事擇師課子然家實窶母閔之諷曰與二子俱死飢寒盡佗圖以活二子乎孺人泣曰吾去而二子活無寧與二子同死然吾十指在二子可不死

也課二子益嚴且勤理補弟子員食餼知府徐君天祺
由翰林出守九重理行藝屬

朝廷特開博學鴻詞科卽薦理應

詔常撫軍安姚學使世榮如所薦入

告戚黨益以此多孺人教子功孺人天姿明達古列女事
往往暗合造次皆可法鄰有屠牛者理方穉往觀卽予
杖旣而曰是地不可久居乃佗徙聞城南盛絃誦又徙
焉理嘗讀書僧寺念僧勤將飢之令卽寺治食曰吾堂
可使僧得登乎有僧學詩于理具蔬筍來謝甫入庭卽
訶理標出其嚴肅如此待人顧有恩李生春華嘗與理

同學早沒寡妻弱子人所依命理醵金恤之仍戒以無
得過其家今十有四年其子能授徒自食矣量治藥寮
助家用有以妻做緼衣質藥者哀其窮卽令送還先世
有公宅衆將鬻之持不可曰是吾夫存日欲葺爲家廟
者也卒鬻田葺之衆無以奪噫嘻難矣哉恤孤弱困窮
仁也遠異教葺家廟禮也家窶能自立不殆智也撫孤
子教之至于有成以踐夫約信也吾求備德于士大夫
未數數然閨閣之英乃若是非所謂難能而可貴者耶
易曰苦節不可貞德誠備則心甘之又烏知其苦耶姚
學使余所取士也理被舉于姚溯淵源來見因請爲彊

人傳余謂孺人例得

旌曷弗請理對曰母命我不敢言噫益難矣孺人今六十有五歲猶彊健不廢女紅理文行又醇粹方立身行道揚名以顯親烏能終抑閼也哉姑質書之俾輶軒之使得采焉

文學曹青及傳

改徐鴻寶作

曹蒲先新建人進士龍溪令諱家甲之孫中書舍人淇之次子青及其字也與兄某孿生甫踰月世父鄉貢進士諱繩植字遜思者病已篤令抱至前卽驚歎曰是兒神表秀出他日姿穎當過我蓋遜思以七歲補弟子員

有神童之目故云爾也甫周歲能言口授以書默識不
忘三歲能向客座誦學而爲政二篇龍溪公絕愛之七
歲小學四子書五經俱成誦舍人課子弟雅不喜速化
止令讀經傳青及年十歲已遍誦十三經八大家文及
宋儒性理諸書猶不肯令習八股文青及竊取先正時
文學之更從諸兄講授體式不數月捉筆爲之理法波
瀾居然老成明年應府縣試卽前列巡撫王公觀風遴
置第二人又明年聞喜裴公來撫江右試童子文拔青
及第一學使沈公校士以振拔老成宿學爲已任每謂
使者寬假幼童開僥倖之門按部十二郡無有以童子

入選者比試新建日未中青及卽呈卷沈公怪其速且訝其劣亟取視之洋洋纚纚風格殊道上疑爲剽襲青及請再試并請背誦五經沈公雜舉經語難記者叩之應聲如響沈公喜形于色卽于公座傍覆試一藝振筆如飛寸晷復就文益勝沈公笑謂諸學官曰我誓不寬假幼童似此子安得不令人愛重因撥入府學第一爲一郡冠時青及年十三自地方大吏以下暨遠近士大夫咸願識其面青及丰姿秀逸然進止應對恂謹莫不以遠大期之先是其母鄒孺人患瘡青及年十一耳以應試所得賞金市蓆以進侍養數年常終夕不就枕席

孺人病革垂涕曰生死固有命但疾不得瘳深負此兒耳母終慟絕哀毀骨立哭無時舍人百計喻之不能禁又自念母早歿益力學冀成名以顯親每夜讀至四更不寢漸孱瘠旣免喪娶同邑孝廉裴某女越二載生一女巽姑未數月青及竟以失血卒初患此疾時恐父憂諱之後竟至不可救藥惜哉青及生康熙庚寅歲十月二十日歿雍正己酉歲閏七月十五日得年僅二十舍人憐其早逝無子嗣命以某子之子某嗣焉

贊曰曹氏以世德起家科名爲南州望姓至青及又能與其世父先後以神童名斯已奇矣然內行並修謹異

乎世之輕雋自喜如裴行儉所譏者乃俱不永年何耶
或云才爲造物者所忌固未必然然德器亦豈不可憑
耶爲敘而哀之無使其無傳也

穆堂別藁卷之三十

臨川李紱 巨來

疏一

請留用赴任遲延同知李震宗疏

奏爲請

旨事據新選廣西柳州府同知李震宗呈爲據實陳情事竊
卑職震宗係江南蘇州府崑山縣人由康熙甲午科舉
人候選知縣于康熙五十九年九卿揀選發往西寧軍
前効力委運柴旦木噶斯等處官兵糧餉并口內口外
軍需雜差俱無遲誤蒙大將軍公川陝年總督給咨回

部議敘于雍正元年吏部議敘以本銜應陞之缺卽用
卽于本年八月分選授今職九月二十八日赴部領憑
正欲星馳到任奈震宗向在口外運糧身受煙瘴寒濕
曾患傷寒及雨足腫痛氣逆嘔塞之症不意一時舊病
疊發兩次于北城兵馬司宛平縣呈報患病緣由俱經
驗明出具印結在案至雍正二年三月初一日報明病
愈起程行至河南地方接見家信報稱震宗之母于二
月間陡患風痰勢甚沉重朝夕懸懸思見震宗一面聞
信之下情知憑限不便有違但母徐氏早年守節于康

熙四十六年奉

旨旌獎止有震宗一子並無兄弟相依邇年以來緣震宗身在邊陲致母積歲憂勞孤苦尤甚今兼病中思子情切震宗神魂罔措方寸靡寧萬不得已暫回原籍省親不料母病纏綿晝夜調治未能遽離直至十月中母病甫痊隨卽兼程就道于雍正三年二月初十日到粵自來遶道回籍地方官出結例有處分故本籍無從出結此外並無別故稽遲伏乞本部院俯察下情曲加慈照念孀居之苦志憐塞外之餘生恩賜矜全等情到臣據此該臣看得該同知李震宗係有功議敘之員因出塞運米得疾出京日遲又因身係獨子中途聞寡母患病遶

道回籍致羈憑限情似可原查官員赴任遠道回籍者
降一級調用等語今查該同知先因懸缺日久經臣
題請以候補同知王沛聞補授柳州府同知其李震宗到
粵卽留粵另補等因經部覆王沛聞准補授其李震宗
俟查明到日再議奉

旨依議欽遵在案今該同知至粵窮苦異常日食不給臣觀
其應對明白尙屬可用又係已經引

覓之員而粵西地遠每遇缺員新補到任羈遲動踰半年可
否卽令該員留粵照所降之級候缺

題補似于人地俱有裨益臣謹具

奏伏乞

皇上勅部議覆施行

議覆安籠鎮請兼轄鄰境疏

該_臣等會議得雲南廣西接壤安籠鎮之流土地方協

營請改受貴州安籠鎮節制一事細查雲南廣西協離安籠鎮將及五百里廣南營離安籠鎮八百餘里相距既遠有鞭長不及之勢且此等處所雖不屬安籠鎮管轄然總係雲貴總督所屬凡有劫殺該協鎮詳報縣督即可提拿究審無隔省掣肘之慮卽文書往返亦不甚多遲時日是滇省之接壤安籠鎮流土地方及各協營

無庸改受安籠鎮節制也至廣西省所屬之上林營離安籠鎮七百餘里鎮安營離安籠鎮九百餘里泗城協所轄之東北一帶村寨雖與貴州之安籠及安順府所屬之普安縣永寧鎮寧二州貴陽府屬之定番州接境而泗城協所管之泗城土府尙離安籠鎮六百餘里亦屬鞭長不及無庸改隸惟廣西之安隆一營止離安籠鎮二百四十里相去最近似應改歸安籠鎮節制但安籠鎮旣轄此處又須受兩廣總督廣西提督節制凡事具詳移咨路途寫遠往返更多時日且安隆營卽歸安籠鎮而安隆營之外復有接壤之區苗蠻互相仇殺之

事仍不免隔省咨提臣等再四籌思似應照舊管轄爲便臣等謹會同定議具

奏伏乞

睿鑒

勅部議覆施行

按此疏係與閩浙總督高其倬同議時俱以

陛見在京也

恭報奉到

勅書併回署日期疏

雍正四年四月二十三日據臣標提塘賁送微臣坐名

勅諭一道到

臣

隨迎至邸館恭設香案望

闕叩頭謝

恩開讀祇領遵奉訖伏念

臣

一介庸愚荷蒙

聖恩簡授直隸總督膺茲重任彌切悚惶昨趨赴

京師恭請

聖安荷蒙

天恩賜予稠疊先後

寵頒上方珍御盈十數種又蒙

親灑宸翰賜

臣

畿輔旬宣膺重寄扶風節鉞選名臣對一聯

天語逾分踖踖徬徨莫知所以自處惟幸依戀

闕廷將及一月日蒙

召對事事躬承

聖訓咸得有所遵循今復欽奉

勅書跼讀之下凡地方事宜一一備載臣益知所恪守惟有

夙夜匪懈殫心竭力以仰報

皇上隆恩于萬一耳茲臣欽遵

聖諭吉期于四月二十六日已抵保定現在照例膳黃頒布

文武衙門一體欽遵外所有領到

勅諭并微臣回署日期理合恭疏

題報并謝

天恩伏乞

皇上睿鑒

請分發候補侍衛疏

該_臣看得三等侍衛王守國藍翎黃正張大烈李大隆
郭琳段興震等六員准部行分發直隸試驗補用一案
查前督臣係奉

特旨統轄提鎮直隸武職皆可

題補爲缺甚多_臣准部行係以總督管巡撫事惟撫標之
缺可以

題補撫標之缺本自無多今正順廣大四府又經另設鎮

臣所轄武職守備尙有數缺若遊擊都司止各一缺而侍衛六人之中有五人係奉

旨甚奸之員若聽其候補無期非所以仰體

皇上愛惜人材之至意也合無請

旨勅下部議于臣標酌留藍翎一二人其餘分發直隸提鎮

各補一人庶分發之員及鋒而用人知感奮而

國家亦得收其臂指之效矣理合具

題伏乞

皇上勅部議覆施行

丙午京察自陳疏

雍正元年四月十二日准吏部咨爲欽奉

上諭事內閣查京察六年一次爲期甚遠應遵

諭旨三年考察一次在外督撫

盛京五部侍郎奉天府府尹等俱于雍正四年四月內照

例自陳等因移咨在案竊

臣

一介庸材迂愚無似由編

修歷陞庶子侍講學士內閣學士兼禮部侍郎調都察

院左副都御史俱蒙

聖祖仁皇帝特恩陞轉不循資格康熙五十九年充會試主考

官因舉子囂鬧革職効力永定河至雍正元年正月二

十五日蒙

皇上天恩召對二十八日

賜還原職署理吏部右侍郎三月二十日

命還都察院辦事六月初五日奉

旨催趙漕船七月十八日蒙

恩特陞兵部右侍郎九月十二日奉

旨俯允奏請赴天津衛截留尾幫漕糧雍正二年二月二十

日蒙

恩議敘加隨帶一級四月初六日奉

旨特授廣西巡撫雍正三年九月十九日准部咨奉

旨補授直隸總督因審理廣西捐案至雍正四年三月初十

日到任伏念臣以廢棄之餘蒙

皇上天恩重加湔濯三載以來屢蒙委任入參卿貳出備封疆不次之榮實夢思所不到匪躬之節矢銜結以無窮豈敢苟就安閒妄求解退惟是性氣粗疎愆尤口積雖蒙

聖恩諄諄訓誨委曲保全而臣質頑莫化任重難勝際此三考之期懇

賜三褫之法迅加罷斥卽永戴

生成矣臣無任惶悚待

命之至伏乞

皇上睿鑒施行

恭陳糶借實情疏

雍正四年七月二十五日准吏部咨考功清吏司案查
得雍正四年七月二十五日內閣交出詹事鄂爾奇等
盤查直隸借糶倉穀三摺奉

旨據鄂爾奇繆沅奏稱直隸借糶倉穀弊端種種無非地方
官巧爲掩飾虧空之計向來直隸倉穀虧缺甚多朕知之
甚悉各官惟恐敗露故設計彌縫詳請借糶李紱爲其所
欺遂代爲題請且未經奉旨卽先爲散給及派員往查又
轉請停止覽鄂爾奇所奏各官情弊顯然凡此等州縣官

員若仍留原任將來假公濟私那新掩舊必至刻剝小民
虧欠正項而地方倉穀始終不得清楚可將巧稱倉穀出
借各官悉行解任著吏部將投供到部候選候補之州縣
俱帶來引見朕親自選定人數其鄂爾奇已經到過之正
定順德大名廣平保定五府所屬贊皇等二十一州縣著
卽將揀選人員掣籤發往鄂爾奇等未到之永平宣化順
天三府所屬之二十一州縣俟伊等到彼查出有出借倉
穀者卽咨吏部簽掣人員前往代之以以上各州縣借出之
穀俱着解任之官員自行催還以一年爲限限內全完者
仍准卽行另補若先期速完者隨到隨卽另補若逾限不

完者治以那移虧空之罪如此辦理則虧空之員不復居現任挾制小民那移出納而接任之員交代井然又無前後不清之項若果係借欠在民按數催還其原官仍可另補于公私均有裨益李紱既不能稽查屬員之巧飾虧空爲伊等欺朦具題代請又不候旨卽令各屬擅自給發甚屬不合着嚴飭行又鄂爾奇等奏稱阜平贊皇等處違例將穀借給兵丁向來無有兵丁借穀之例着九卿察明具奏聞直隸各處倉廩久未修理傾圯者多此皆地方官漫不經心李維鈞不實心任事之故着李紱嚴飭各屬設法速行修整該部知道欽此交出到部相應抄錄原摺移咨

該督欽遵施行等因到臣欽此除轉飭各屬欽遵及設
法修整倉廩外竊臣于未報災州縣代請糶借倉糧一
事既不稽查屬員巧飾之虧空反爲伊等欺朦代請又
不候

旨卽令各屬擅自發給甚屬愚昧罪無追蒙

皇上天恩不立賜黜罷止著飭行聞

命之下感愧無地

臣

不知何修獲蒙

皇上寬大之恩至于如此之極也但糶借實情

臣

有不得不

據實

上聞者

臣

于本年三月內入直隸境由邯鄲至保定八百餘

里所至俱有饑民環擁呼籲州縣等官亦間有懇請糶

借者

臣

素聞直隸虧空未敢輕許到任後行文通飭所

屬州縣將倉糧實貯數目造報仍委員將未報災應糶
借州縣倉糧盤查然後批准現有

臣

通行一百三十八

州縣衛所文書在案是冒昧糶借之罪實

臣

一人所爲

今經

臣

批准糶借之州縣俱奉

旨解任而

臣

獨蒙

天恩從寬飭行

臣

拊心自問不惟無以仰報

皇上任使之恩亦無以謝解任之員懇乞

皇上將

臣

交部嚴加議處卽行罷黜庶

臣

心可安而

聖恩之高厚益銜結于無窮矣臣謹繕疏恭謝

天恩併陳實情伏祈

皇上睿鑒施行

請將王定鎮兵餉就近支放疏

該臣看得正定鎮十關營官兵歲需俸餉等銀當日原

係駐札正定府之井陘道司放嗣于康熙三十七年八

月內于裁汰閒冗官員事案內將井陘道議裁

題明將一切收放兵餉稽查盜案比照保定之例令守巡

道附近管轄奉

旨依議欽遵在案今准正定鎮臣楊鯤咨以赴藩司衙門請

領往返跋涉窮卒多累請援照大名協營之例就近在
于正定府司餉以免往返等因經臣行據布政司德明
議覆前來查正定鎮屬左右龍固并固關龍泉倒馬插
箭嶺茨溝忠順王家坪等十關營歲需俸餉銀兩旣准
王定總鎮咨以赴藩司衙門請領雖往返僅五六百里
第夏秋河水漲發每爲阻隔冬春嚴寒尤難跋涉盤費
守候途路疎虞窮卒未免多累請援照大名協營之例
就近在于正定府支領以免往返等因相應循例以雍
正五年爲始飭令正定府就近司餉查正定鎮左營俸
餉向係正定府監放今十關營官兵俸餉錢糧旣已盡

歸正定府司放未便仍行監放應將正定鎮左營龍固
二營改令同城之正定縣就近監放以杜扣剋之弊其
餘右營并固關等八關營糧餉仍行照舊令附近各州
縣監放按本季出具印結年終同兵馬錢糧奏冊呈送
咨部至于按季實支俸餉等銀冊領應由正定府核明
鈐印送布政司核轉掛發照支其兵馬錢糧及朋馬各
項奏冊亦由該府策造送司核明呈送具

題庶爲允協理合具

題請

旨伏乞

皇上勅部議覆施行

請定天津鎮及山永協兵餉支放疏

該

臣

看得津鎮七營并山永協十四營路歲需官兵俸

餉等銀向係天津通永二道司放嗣因天津通永二道

改爲河道經

臣

將津鎮七營官兵俸餉應仍歸天津河

道司餉山永協十四營路官兵俸餉應就近歸永平府

司餉緣由咨部准部覆行令將應委何員監收之處妥

議具

題等因行據布政司議覆前來查永協十四營路兵餉向

係通永道司放津鎮七營兵餉向係天津道司放今通

永道既改爲河道永平府不屬道轄相應循照大名協五營分飭順廣大三府司放之例將永協各營路責令永平府就近司餉盧龍等州縣監放內如左右燕河林等四營路仍令盧龍縣監放山海路石門義院大毛黃土等五路營令管關廳監放臺頭界嶺二汎令撫寧縣監放建昌冷口令遷安縣監放榛子鎮令灤州監放再天津道亦改爲河道其津鎮七營駐劄天津州地方非河間府所轄而天津州雖係地方有司但津鎮各營分防汎地多非州屬所有俸餉等銀應仍歸同城之天津河道司餉照舊令就近州縣監放仍今按季出結年終

隨同兵馬錢糧奏冊呈送咨部其兵馬錢糧及朋馬各
項奏冊由該道府築造送司核明轉送具

題庶兵丁不致遠離汛守而錢糧亦歸畫一矣理合具

題伏乞

皇上勅部議覆施行

穆堂別藁卷之三十一

臨川 李 紱 巨來

疏二

請將密雲知縣辟天培補開州知州疏

題爲請留賢員事

臣

竊查得直隸衝煩數倍外省必藉賢

能之員方資臂指之用今查得順天府密雲縣知縣辟

天培者由雲南進士一等選補密雲催科撫字有方屢

辦大差無誤疊經議敘加二級紀錄四次雍正二年

計典卓異奉

特旨辟天培年少密雲縣員缺緊要准其卓異着回原任効

力三年再行陞任欽此欽遵在案該令感激

天恩奉職愈勤循聲彌著今歲因將社倉穀借給百姓在于
四十二州縣之內奉

旨解任及至該員解任之日百姓倉皇奔赴卽于次日一晝
一夜交至四更全完分查官翰林院編修金以成親見
其事及新任知縣到縣徹底清查交盤毫無虧空已經
新任知縣羅仙文出具冊結到臣似此賢員實爲希有
令該縣請咨遵

旨赴部另補除給咨外臣查直隸衝煩賢員難得恭疏仰懇
皇上將薛天培仍留直隸補用再查現有大名府開州一缺

爲

畿南財賦重地新選官係四川隆昌知縣劉琨萬里邊員
到任無期倘蒙

天恩將薛天培補授開州知州則地方大有裨益如原選官
到日卽留直隸另行

題補再查薛天培係卓異知縣應陞知州同知之員雖奉
旨年限未滿但已離原任無由于密雲効力似屬合例臣爲
地方需人起見謹據實

題請伏乞

皇上睿鑒施行

覆奏資送牟慤旅櫬疏

雍正四年八月初六日准吏部咨前事八月初三日奉
旨朕聞知縣牟慤居官聲名好故降旨調來引見今伊在途
病故甚屬可憫着直隸總督李紱料理令其旅櫬早歸並
行文江南巡撫張楷將伊家口照看資送回籍該部知道
欽此等因移咨到臣臣欽此臣卽欽遵飛檄涿州知州昌天
錦詢問已故知縣牟慤親屬家人商酌料理仍將起程
回籍日期併用過銀兩報臣隨據涿州知州昌天錦呈
報原任知縣牟慤于六月初一日病故當卽面同伊子
貢生牟日堅料理妥當于未奉

旨之先本月初三日護送回籍臣以本月二字未能分明復行確查又據呈報的于六月初三日料理回籍去訖等語除臣一面咨明山東撫臣陳世倌行知牟慤本家外仍差員賁送銀一百二十兩至牟慤家助其殯葬以明天恩欽惟

皇上如天之仁優恤臣下不遺于微員無分于存歿此誠史冊之所未有凡屬臣工皆當爲之感泣者也所有貢生牟曰堅護送伊父牟慤旅櫬回籍及臣差員賁送銀兩助其殯葬情節理合題明伏乞

皇上睿鑒施行

議覆武職陞選之法疏

題爲請定武職陞選之法以收實効事該臣查得武職副將以下輾轉加銜調任之例實覺過煩旣失練習風土之益徒滋奔走道路之勞理宜變通以昭法守今兵部條陳十款除補授副將一款已蒙

皇上俞旨外其補授叅將等官之處復蒙

勅令各省督撫提鎮各抒已見確議具

奏仰見我

皇上慎重選政鼓勵人材之至意查兵部所議補授叅將以下較俸以缺陞缺免其調任其加銜者照依京俸以及

卓異邊缺各條俱覺斟酌盡善可無擬議惟第十款藍翎侍衛與世職人等一體補用守備停其補用都司似宜仍循舊例查世職人等俱緣祖父功名並非本身材藝止補守備以酬勳庸未爲不可若藍翎侍衛則皆

皇上揀選內廷學習之人自與世職不同再查定例文進士館選翰林院庶吉士者二甲授編修三甲授檢討俱一體較俸武進士挑選侍衛者二甲授三等侍衛三甲授藍翎侍衛三等侍衛以遊擊都司用藍翎侍衛以都司守備用是武進士二甲三甲之分別陞轉比之文進士二甲三甲編檢一體較俸陞轉者已自懸殊今併令不

得兼陞都司未免分別太過似應仍照舊法以都司守
備兼補庶藍翎侍衛人等皆知奮勵所有欽奉

諭旨事理理合備陳一得可否採擇伏乞

皇上睿鑒施行

奏明提臣追換揭帖疏

竊臣親審得鞏華城都司杜愷縱兵擾民于雍正四年
九月初四日有該都司兵丁任禮等無故夜入民人丁
大之家將丁大併工人李大張三帶至都司衙門隨有
民人安二前往都司衙門遞具保狀該都司杜愷既不
釋放又不移送該管地方文職詢明將丁大安二李大

張三等徑差兵丁盡行鎖解保定按察司衙門續又遷
怒將民人崔榮王有志鎖解保定按察司衙門俱經謾
按察童華審明該兵弁生事擾民鎖解拖累于九月初
十十三等日呈詳到臣經臣卽于九月十三日親行覆
審無異當卽敘具該都司杜愷縱兵擾民情節于九月
十四日咨會古北口提臣何祥書查照應否與臣列銜
會叅隨于九月二十日准到提臣咨文內稱敝屬武職
劣員理應本提督自行

題叅咨覆到

臣

併于九月二十四日據提塘賁送到提臣

揭帖內開爲

題叅事切照職屬鞏華城千總羅士隆因查夜兵丁見丁
大麻子家後門不閉進他家去將丁大麻子及伊家工
人拏解都司該都司杜愷並不以兵丁爲非次日鞏華
城鋪戶罷市職據報隨一面行查一面移咨督臣俟覆
到核叅在案茲准督臣咨稱都司杜愷縱兵擾民應否
列銜會叅等因查係職屬劣員理應職自行

題叅除咨覆外所有縱兵之鞏華城千總羅士隆鞏華城
都司杜愷相應

題叅伏乞

皇上勅部議覆施行再照昌平營叅將楊雲棟職司統轄此

等劣員並不揭報狗庇之咎亦所難辭合併指叅統聽部議爲此除具

題外理合具揭須至揭帖者在案查

臣欽奉

勅書內開載如有武職騷擾地方擾害良民等事聽

臣會同

提督總兵官糾叅此事經

臣親自審出自應

臣與提臣

何祥書會同列銜糾叅旣准提臣咨稱本提督自行

題叅

臣卽仰體

皇上訓誨和平不敢爭執今于本月二十五日據提塘李鳳

儀稟稱提督本章已經追回請將揭帖發下以便封還

等語又于二十六日准提

臣專差咨稱請將前項揭帖

發付去役賁回更換等因到

臣臣

查揭帖關係本章事

理提

臣

卽有錯誤止應自行檢舉何得追回本章且咨

行到

臣

希爲更換揭帖當將不便咨回緣由咨覆又于

二十七日准提臣咨送到更換揭帖添入民人罷市等

語更與前帖大異查都司杜愷縱兵擾民及提臣何祥

書追回本章咨換揭帖均干嚴例

臣

不敢徇隱理合據

實

題明伏乞

皇上睿鑒施行

請設天津北倉大使疏

據管理天津關印務按察司浦文焯呈詳天津北倉地方倉廩前督院奉

旨委本司承造原因截漕重務而設今經拆卸賠修較前起高地基廩屋圍牆加工堅築存貯米石似可無虞目下因保定河間二府屬州縣截米十萬石本司遵奉檄委照數截留湖南頭二兩幫漕米其保定州縣未領米石現在存貯北倉海運米十萬石已有四萬石先到亦于此倉收貯此時除倉斗數名嚴諭其晝夜巡守外業經牌行該管武清縣令其差役協守但貯漕重地倉斗衙役均難信托再佐貳各員雖奉檄委然亦各有所司久

遠端任似多未便本司以倉儲起見詳請

題明端設倉大使一員端管北倉倉務則各員既不須臨

時調委而漕儲可永遠無疎虞之患等因到臣隨批仰

布政司速議覆奪今據布政使德明議覆前來臣再加

覆核查得天津北倉倉廩原因截漕存貯米石而設今

湖南頭二兩幫漕糧十萬石現今截留于此而海運米

十萬石先到四萬亦于此倉收貯自宜加謹防守以免

疎虞應如管理天津關印務按察司浦文焯所請端設

倉大使一員管理倉務以端責守庶爲妥便理合具

題伏乞

皇上勅部議覆施行

覆奏景州蝗蝻疏

奏爲遵

旨明白回奏事雍正四年十二月三十日准吏部咨稱雍正四年十二月二十四日奉

旨據李紱奏稱景州知州王安仁到任以來捕絕蝗蝻實心出力等語倘直隸地方果有蝗蝻李紱理應奏報如何隱匿至今于保題王安仁本內始行聲明況王安仁于今年五月內到任今年直隸地方雨水調勻並未聞有蝗蝻萌動今將此徧問直隸在京大小官員俱稱景州地方不聞

有蝗蝻他處亦不聞有蝗蝻等語李紱所奏王安仁捕蝗
蝻係何月何日之事着李紱明白回奏該部知道欽此爲
此合咨前去欽遵查照施行等因移咨到臣竊查景州
地接山東爲南北往來運道水陸交馳實爲衝劇我

皇上聖明洞鑒以景州知州員缺緊要王安仁人平常令臣

留心試用臣以王安仁人本平常因奉

旨試看頗知自勉到任以來革除陋規捕絕蝗蝻尙堪供職

經臣

題覆欽奉

上諭以王安仁捕絕蝗蝻係何月何日之事令臣明白回奏

臣查景州爲九河故道蝗蝻易生間有魚蝦遺子變生
草蝻雍正四年七月二十四日據陞任布政司德明詳
據景州報稱蝻孽萌動目下黍稷穀子膏糧收割七八
不能爲害但留此餘孽恐有明歲之患等情前來經臣
檄委原任景州知州趙弘烈前往協捕八月十三日據
布政司詳據景州報稱蝗蝻捕絕等情各在案查直隸
向來蝗蝻初生卽行捕絕者俱不

題報臣以未經

題報之事謬入章疏實臣愚昧謹將捕絕蝗蝻月日原由

據實具

題伏乞

皇上睿鑒施行

覆奏直隸忠節疏

爲欽奉

上諭事據直隸布政使司布政使張迺呈稱案蒙前任總督李部院牌開准兵部武庫清吏司案呈准禮部咨稱會議前事行文八旗并直隸各省督撫查明臨陣捐軀守土授命之文武諸臣以及偏裨士卒赤心報國奮不顧身者將籍貫事蹟詳晰繕冊具奏等因當經移行確查去後今准各道府直隸州等覆稱所屬境內並無臨陣

捐軀守土授命文武諸臣亦無陣亡偏裨士卒事蹟並無隱匿不報情弊等因惟文安縣開報原任江南崇明縣知縣陳愼委係赤心報國守土授命之人于雍正三年九月十八日蒙署督部堂准順天府尹移開業經具題行知在案又據山海衛守備白煥樞申稱據張振麟呈稱麟故父張朝臣係直隸山海衛中前所人由康熙十五年武進士歷任衛守備于康熙四十七年推陞浙江處州右營都司次年十月內遇大柘山賊盜猖獗麟父朝臣于十二月初十日率領弁兵征剿奮不顧身自辰至巳力竭遂遭賊害奉

特旨贈安遠將軍蔭子一人以衛千總推用等情又據慶雲縣知縣管學宣申稱查得縣誌開載縣令張必科係遼東蓋州人由恩貢出身順治四年冬十月到任兩閱月間宿弊盡革上恬下熙民荷更生但定鼎之初鄰封寇盜無日無之必科每遇寇過卽鼓聚步騎親出驅逐簡鄉勇嚴保甲城壞者補之壕淤者濬之規畫未就巨寇忽至必科身擐甲胄率衆登陴以忠義鼓勵士氣人皆願爲盡死惟城修未完難于固立必科更勵衆據守西北箭無虛發外援不至絃斷手傷擲弓挺戈下城賊環圍之亦不敢逼至一晝齋舉火自焚時順治五年正月

二十六日卯時事也直指上其事于

朝贈爲僉事邑人共爲立碑崇祀名宦等情又據調任知府
曾逢聖呈據魏縣知縣馬襄申稱據儒學生員張邇遠
呈稱生祖張可久由順治十二年乙卯科武進士選爲
侍衛至順治十八年秋推陞廣東廣州府水師右營遊
擊鎮守江門重地至康熙二年十月初六日突有叛賊
周玉李營等連營犯境生祖率領兵丁身先迎敵血戰
自己至申殺賊數百賊船接濟益多我兵別無應援力
竭死于戰場至康熙九年叨蒙

聖恩賜給葬銀至康熙十年九月二十五日又蒙遣大名府

知府周邦彬奉行

諭祭等情又據南樂縣知縣毛天文申稱據本縣儒學生員胡虞胄呈稱胄祖胡鑣係順治壬辰科武進士任浙江寧波府提標前營遊擊于康熙十四年四月內值耿逆之變胄祖胡鑣借爲水師先鋒率衆入海後四月初十日以二十餘艘當賊二千餘艘自辰至酉鏖戰終日矢盡援絕身負重傷慷慨赴海身死于康熙十四年四月內蒙浙閩總督李之芳奏

聞奉

旨賜贈給與祭葬廕子桂生以守備用再親丁周世和石洪

宇以營中缺伍遂拔補提標前營兵糧累從出征有功
見主下海身死俱赴海相從因從前原無奏報士卒捐
軀之例故未將周世和等奏報今奉行查擬合一併呈
明伏乞轉申等情又據趙州知州徐士鎡申稱據臨城
縣知縣李榮白呈稱據民人劉其玉結稱玉父劉芳周
于順治乙未年中式武進士初任陝西興安州守備陞
湖廣桂陽縣兩桂營都司于康熙二年陣亡追贈遊擊
蒙

恩賜御葬于康熙十年塋內建立牌坊碑書康熙十年
欽賜御葬坊書恩光泉壤字樣其

題奏年月并督撫提鎮姓名何年月日奉

旨玉時在幼穉不能記憶今奉飭查理合據實結報詳等情到司據此該本司查得臨陣捐軀守土授命文武諸臣及偏裨士卒赤心報國者既據各屬查明造具事實清冊前來理合呈送核

題等因到

臣據此該

臣看得臨陣捐軀守土授命文武諸

臣以及偏裨士卒赤心報國奮不顧身者准部咨行令各州縣查明事蹟詳晰繕冊具奏等因經前任督臣李嚴飭各屬奉行確查去後嗣因各屬造冊事蹟籍貫俱已集齊並付駁查妥造先經咨明禮兵二部在案臣于

到任後查案嚴催今據布政司張适呈稱據魏縣查明
原任廣東廣州府遊擊張可久南樂縣查明原任浙江
寧波府提標前營遊擊胡鑣並士卒周世和石洪宇山
海衛查明原任浙江處州右營都司張朝臣慶雲縣查
明原任慶雲縣知縣張必科等實係臨陣捐軀守土授
命赤心報國奮不顧身之人并聲明臨城縣查報原任
湖廣桂陽縣兩桂營都司劉芳周業經咨查楚省俟查
明另行具

題謹將各員籍貫事蹟恭繕黃冊

進呈

睿鑒并造冊咨部外理合具

題伏乞

皇上勅部議覆施行

請

旌烈女王二妮疏

題爲報知事該

臣

看得長垣縣張二小因姦勒死王宗湯

之女王二妮身死一案緣二小藉隸山左寄居長垣爲
宗湯佃種地畝雍正四年六月初四日王宗湯攜妻并
幼女往探妻父留長女二妮在家獨處二小自地旋歸
頓起淫心攜帶皮條入室強欲求姦二妮不從聲喊二

小情急用手捏住二妮咽喉扳倒復用皮條纏勒項脖
二妮掙扎二小又取桌上鐵鎚打扎二妮左額角左眼
角左腮頰右腮頰左項頸左耳根等處殞命歷審供認
不諱張二小合依故殺律擬斬監候再查王二妮村庄
弱質能知大義寧甘慘死不爲強暴所汚應照例
旌表以維風化理合具

題伏乞

皇上勅下三法司核覆施行

按此疏與池烈婦等疏皆審讞常語非有文義可存
特以余生平敬重忠孝節義之人存此疏卽爲節烈

婦女作傳張本異時省府州縣志書因而采入則其
人不朽矣余修八旗通志見史書錄書亦多朽蝕則
國史列女傳或亦有取焉故不得而棄也

請

旌池烈婦疏

題爲面報事該

臣

看得成安縣安有民因姦打傷池氏投

井身死一案緣雍正四年六月初三日池氏因家貧難
度與夫角口隨往伊姊胡池氏家告知情由胡池氏慰
言相勸責令回家薄暮行至村外被伊姊房主安有民
撞遇見氏少艾頓起淫心強欲求姦氏卽喊叫堅執不

從有民遂用拳毆傷池氏額顱右眼胞等處地鄰奔救
有民始逃氏憤投井殞命歷審供認不諱安有民合依
因姦威逼人致死者斬監候律應擬斬監候池氏激烈
捐軀不爲強暴所污應請照例

旌表以慰幽魂理合具

題伏乞

皇上勅下三法司核覆施行

請免震陷倉糧疏

該臣看得懷來縣叅革知縣鄒肅恒名下應賠康熙五
十九年地震壓陷新興倉米六千六百五十五石八斗

一升零經前任督臣李維鈞于肅恒虧空

題招案內聲明援例請豁准咨行令仍照戶部原議着落
鄒肅恒賠補等因行據陞任布政司德明呈稱鄒肅恒
名下應賠康熙五十九年地震案內壓陷米六千六百
五十五石八斗一升零屢經勒追未據完報等因呈詳
前來臣覆核無異但此項米石相距在七十里外因一
時地震倉廩搖倒災民挖食事出不測並非鄒肅恒侵
那虧空之項今肅恒因補正項虧空原籍產業已經變
追任所長墊各銀又皆陸續完補其壓陷米石實屬無
力可補似應照糧船漂沒之例請

旨豁免理合具

題伏乞

皇上勅部議覆施行

議覆祀先蠶典禮疏

代

該_臣等議得農桑爲衣食之源理宜並重周制諸侯亦有公桑蠶室今督撫大臣比古之方伯連帥府州縣比古時候伯子南之邦則直省宜得並祀

先蠶應如河東督_臣王士俊所請凡有蠶郡縣咸令建立壇廟著爲祀典至于蠶神名號歷代不同據周禮鄭注上引房星天道幽遠歷朝不以天駟爲祀淮南子引蠶

經言黃帝元妃西陵氏始養蠶故北齊祀黃帝後周祀西陵氏然唐虞以前世遠難稽漢祀苑窳婦人寓氏公主尤爲無據自明中築螯正祀典山川百神各依本號本朝監于明制因而不改如農始炎帝止稱

先農神位則

先蠶之祀亦止應直稱

先蠶神位其祀期及壇廟祀物舊禮可從者蠶爲女事宜用陰禮祀期自隋以來並用季春吉巳壇置于北郊幣用黑祭用瘞埋以荅陰氣不用燔燎此不可易者若壇之高下方廣祭品陳設繁簡列史所載俱屬王朝之典

未可引用攷唐制先農先蠶並列中祀致齋二日今

先農之祀已定禮文

先蠶之祀禮宜相同除壇地黑幣瘞埋法當分別外其餘
悉依

先農典禮壇高二尺一寸廣二丈五尺神牌高二尺四寸
廣六寸座高五寸廣九寸五分壇前設瘞埴壇後祠宇
正房三配房各一正房中供

先蠶神位紅牌金字東正房貯祭器西正房貯樂器東配
房貯臨祭時祭品西配房看守祠壇人役居住祭物用
黑色帛一羊一豕一鉶一籩四豆四簋二簋二其行禮

儀注每歲以季春巳日祭

先蠶之神先期致齋二日祭日黎明承祭官朝衣請

神位出祠安設壇上北方南向陳設祭品率各官衣朝衣
禮生引承祭官至拜位通贊唱執事者各司其事陪祭
官各就位承祭官就位通贊唱瘞毛血禮生引詣盥洗
所贊盥洗淨巾引詣香案前贊迎神行二跪六叩頭禮
興行初獻禮引詣

神位前跪奠帛獻爵叩頭興詣讀祝位跪衆官皆跪宣讀
文畢叩頭興引唱復位通贊唱行亞獻禮引詣

神位前跪獻爵叩頭興復位通贊唱行三獻禮如亞獻儀

通贊唱飲福受胙引唱詣飲福受胙位跪飲福酒受福
胙叩頭興謝胙一跪三叩頭興復位通贊唱徹饌送神
行二跪六叩頭禮興通贊唱司祝者捧祝司帛者捧帛
各詣瘞所引唱詣望瘞位瘞畢揖復位通贊唱禮畢送
神位歸祠其祝文則隳書原文可用畧加潤飾文曰維
某年月朔日某越祭日某已某官等敢昭告于

先蠶之神維神肇興蠶織衣被海宇爰擇嘉時式遵令典
謹以幣帛犧牲粢盛庶品明薦于神尙享右臣等叅酌
古今擬定祀法恭呈

睿覽如蒙

俞允卽通行直省可也臣等謹

奏

辛酉京察自陳疏

奏爲遵例自陳以肅察典事先准吏部咨稱自乾隆三年起至乾隆六年京察之期已屆滿漢大臣自陳官員若有公差丁憂告病養親給假在外者于到京之日卽行自陳等因臣于乾隆二年

欽差祭告順道省親比及到家卽丁母憂至乾隆五年服闋到京候補六年三月十八日奉

特旨補授今職此三年之內雖未居官但臣自雍正二年在

直隸總督任內自陳之後罷職年深起官日淺未逢京
察者十有五年理應補行自陳以肅察典竊臣以一介
庸材受

三朝殊遇內忝卿貳外忝封疆

恩實重于邱山報未伸乎毫末初蒙

聖祖仁皇帝由翰林院編修超擢至內閣學士兼禮部侍郎都
察院左副都御史文武鄉會五任主司以士子闈榜革
職發永定河効力雍正元年正月蒙

世宗憲皇帝特旨昭雪永禁開榜復還原官署理吏部侍郎充
經筵講官六月趙催漕運七月實陞兵部侍郎二年四月

特命巡撫廣西三年九月陞任直隸總督四年十二月奉

旨不宜總督之任內轉工部侍郎五年三月奉

旨往雲南會同雲貴總督鄂爾泰等辦理粵黔分界泗城改流
等事緣總督任內保舉屬員等案革職交刑部治罪議
置重典蒙

特恩免死在八旗志書館効力恭逢

皇上登極特旨給侍郎職銜管理戶部三庫旋補戶部左侍
郎充入旗志書館副總裁又兼兵部侍郎乾隆元年五
月因保舉新進士事降二級調用六月奉

旨仍在副總裁上行走十月奉

特旨補授詹事十二月奉

特旨充三禮館副總裁二年五月奉

旨往浙江南祭告

恩允順道省親到家卽丁母憂五年六月到京復

命仍在兩書館行走今年三月初一日奉

特旨命充明史綱目副總裁十八日奉

特旨補授今職伏念

臣

賦性粗疎當官迂拙三仕而三已信

臣職之多愆屢黜而屢收實

國恩之過厚今

臣

年六十有七精力日衰智慮日短較之

從前更虞隕越伏乞

皇上解臣職守俾專在書局行走尙可勉竭駑駘庶得保全

臣叩懇之實情並非自陳之虛說尙蒙

日皆戴

孫圖永報效

臣謹